

55638
0A22

v.7


東序

記言

卷之六

BERKELEY
LIBRARY
UNIVERSITY OF
CALIFORNIA

廿五



記言卷之三十九 東序記言

德山碑

先生姓曹氏諱植字捷仲甫其先昌寧縣人高麗刑部員外郎瑞之後而中郎將殷之四世孫也曾大父國子生員安習大父永奉事父承文院判校彥亨母淑人李氏皇明弘治十四年六月壬寅先生生於嘉樹縣少豪氣絕倫學文章好讀左柳氏自負其奇才二十六見魯齋心法志伊尹之志學顏子之學出則有為處則有守惘然自失喟然嘆息而言曰古人為己之學蓋如

此刻意奮厲勇往直前既博於百氏反而守約
剛毅方嚴目無滯視耳無側聽莊敬不惰自成
一家之學以太一為宗以和恒直方為符以克
治為先以冲漠為本不喜論難荅述以為徒言
無益於躬行尚志潔身不苟從不苟默不自輕
以求用卓然有立言學必先自得而貴高明常
言曰譬如登高萬品皆低然後惟吾所行自無
不利以行已大方出處大節為重作神明舍銘
有曰九窺之邪三要始發動微勇克進教廝殺
又書之曰沉舡破釜甑燒廬舍持三日糧以示

必死無還心如此廝殺可言於吾心須有汗馬
之功教人必隨人資稟而激勵之不開卷講論
曰今之學者高談性理無實行於其心如遊通
都大市見珍寶竒玩空談高價不如沽得一尾
魚聖人之旨前儒既盡言之學者不患不知患
不行其得力之淺深在我之誠不誠如何耳吾
於學者喚覺昏睡而已開眼能見天地日月談
經說書不如反求而自得之觀書亦不曾章解
句釋領略其宗旨而已 中宗明宗連以遺逸
召不起 明宗特拜丹城縣監又不起上疏曰

國事已非邦本已亡天意已去人心已離慈
殿塞淵不過深宮之一寡婦殿下幼冲只是
先王之一孤嗣天灾之百千人心之億萬何以
當之也何以收之也殿下所從事者何事也
好學問乎好聲色乎好弓馬乎好君子乎好小
人乎所好在是而存亡繫焉疏入不報明年
上大召儒學成運李恒林薰金範韓脩南彦經
等先生亦在召中乃就徵拜尚瑞院判官上
引見思政殿上問昭烈三顧草廬事先生對
曰必得人然後可以有為也然亮事昭烈數十

年卒不能興復漢室臣不敢知者也即還山丁
卯宣祖即位嚮用儒雅禮召甚至而先生終
不起上䟽言君德政弊曰臣索居深山俯察仰
觀唏噓掩抑繼之以淚者數矣臣於殿下無
一君臣之分何所感於君恩而咨嗟涕洟自不
能已也食土之毛為累世舊民可無一言於宣
召之下乎已巳特拜宗親府典籤不就辛未令
本道賜之粟以賙之先生上䟽謝曰進君義後
年監司以疾聞上遣中貴人問之先生已沒
二月八日年七十二先生嘗作佩劍銘曰內明

者敬外斷者義愍壁又大書敬義曰吾家此二字如天地之有日月疾病呼門人金字顯等語敬義疊疊曰用工既熟無一物在胸中吾未到此境戒內外安靜旋席東首而歿時有南師古者善觀象曰少微無光處士之裁先生沒上祭之曰天不勑遺大老小子疇依追爵大司諫其四月葬德山光海時加贈領議政謚文貞先生別自號曰南冥嘉樹有鷄伏堂涵養如鷄抱卵之義也其溪上亭曰雷龍亭尸居龍見淵默雷聲之義也晉州德山有山天齋易大畜剛健

篤實輝光日新其德者也墳墓在山天齋後德
溪守愚寒岡東岡數賢者皆師事之德溪曰刻
意堅節守愚曰剛大遯遠之才東岡曰烈日秋
霜之氣寒岡曰有泰山壁立之像退陶李先生
曰槌仲合於君子出處之義云銘曰
高潔自守隱居行義不辱其身不降其志不屈
道而循時高尚其事

文穆公壙銘

先生諱述字道可姓鄭氏鄭氏系出清州高麗
上將軍顓實爲始祖上將軍後有監察御史僎

僉議贊成瑑清河君憤左諫議大夫誦清原君
樞政堂文學摠上護軍孝忠司憲執義沃卿顯
者九世號爲大族執義生鐵山郡守胤曾郡守
生司憲監察應祥監察生 贈吏曹判書恩中
於先生爲皇考妣星州李氏 贈貞夫人夫人
父諱煥隱德不出 明肅皇帝嘉靖二十二年
癸卯先生生於星州之沙月里生七八歲受大
學論語通大義十三受易乾坤於吳德煥先生
推類而通長者師之弱冠見陶山李先生講心
經得聞爲學之方遂棄舉子業專心經學三年

見曹南冥先生曹先生許以君子大節隆慶一
年先生二十六先夫人歿時喪禮廢壞先生持
喪之節一從儀禮先生生九年先府君歿矣合
葬於蒼坪萬曆元年我 昭敬王命薦士金宇
顯白 上曰有鄭述者遊李滉曹植之門明於
經術可以布衣召問治道也選曹請叙六品大
臣不可初授禮賓叅奉不就撰家禮集覽補註
三年拜 健元陵叅奉不就六年陞授司圃宗
簿主簿義興三嘉縣監七年為知禮縣監皆不
就撰婚儀八年拜昌寧縣監 上引見問李滉

曹植學問何如先生對曰滉踐履篤實工夫純熟植超然自得特立獨行上仍問大學工夫對曰先儒言天德王道其要在謹獨帝王之學亦無一不在謹獨上曰治邑當何先對曰古人云若保赤子臣不敏請事斯語上稱善一年以治理聞特賜表裡以獎之及謝歸邑人立生祠追思不已九年拜司憲持平宗親府典簿儀賓都事社稷令謝歸明年撰冠儀十年拜軍資判官不就十一年拜江原忠清都事工刑戶曹正郎皆不就與諸生為朔月講會之契依藍

田約條勉戒以明其道不計其功正其誼不謀其利勿汲汲於富貴勿戚戚於貧賤六者十二年特拜同福縣監上問治道勉諭遣之一年上命校正經書解先生被召復為工曹正郎上疏乞歸承政院啓留之卒謝歸連為軍資僉正古阜郡守明年為慶尚都事皆不就特拜咸安郡守問舊俗修廢政表忠臣孝子立迂拙子廟封多勿墓三年謝病歸有去思碑十九年拜通川郡守明年倭連陷三京國大亂上西狩上兄河陵君避亂山谷中為叛民所迫死而不

知處先生因問囚得罪人既收殯以事聞上
曰無以報德特加通政上疏辭陞拜江陵大
都護府使當師旅之際庶事板蕩為之修器械
廣屯田賑飢乏民乃蘓二十二年入為同副承
旨累轉至右承旨嘗在經筵上問易程傳本
義何先生對曰易之道明乎消長之理不失
時中而已徒占候末也程傳為先二十三年移
判決事二十四年拜江原道觀察使入界謁魯
陵令列邑遍祭國殤埋齒原州封高麗隱者元
天錫墓等錫原城置元冲甲祀壇復入為右承

旨尋改刑曹叅議二十五年出為成川都護府
使時倭連陷兩湖諸王子在成川 上戒之曰
慎之母見過於賢府使云明年特加嘉善上疏
辭不許受命立高麗忠臣鄭顥崔椿命二人祠
編次古今忠謨二十八年拜副摠管上疏論山
陵事時有 懿仁王后之喪將葬有妖言故上
疏言之尋拜刑曹叅判辛丑為寧越郡守方校
正經書解特留之三十年為忠州牧使又以校
正事被召明年撰五先生禮說心經發揮絕鄭
仁弘又明年拜工曹叅判不就作武屹藏書編

次洙泗言仁丙午撰治亂提要連有洪海光三
州之命皆不就三十五年又有安東之命時先
生已六十五引憲令上疏乞免不許一年謝歸
明年光海即位以副揔管特拜大司憲兼世子
輔養官教曰以先王禮遇特擢用云上疏力辭
不許又上疏乞歸仍言臨海君貸死事累百言
其疏有曰臣竊觀獄情連累多濫其逮繫者亦
多宗戚之臣或有含冤就死則彼雖親疎有間
實則祖宗血氣之一脉豈不深可哀也殿下
同氣之中與之同胎只有臨海臣知殿下至情

尤有不忍焉者。參酌恩義，公聽達聰，獄不必盡
究，人不必盡問，罪不必盡覈，法不必盡施。寧有
不經之失，臨海亦蒙不死之貸。舉國臣民咸以
為聖上友愛如此，至仁如此，處難如此，好生之
德出尋常如此。人心翕然，四方咸悅。光海不聽
連上疏自劾，又三辭乃許。即出國門，政院請召
還，又下諭召之，不就。拜刑曹叅判，命會葬。穆
陵又以全恩事上疏自劾。時有大喪，喪服之節
十八條，既葬還鄉。上疏乞解官，許之。三十八年
有鄉人朴而立者，以大逆誣告先生。先生詣州

家席藁請命光海不問也仁弘有族子滄實陰
嗾云三十九年釐正經書口訣四十一年有朴
應犀者上變告國舅金悌男推戴永昌為言事
上累 太妃先生上疏曰事固有不可貸者然
在殿下處之或未盡則來天下後世之疑終累
於聖躬者不可不慎也博考前後帝王之往跡
深惟古聖人處變之道使在我者無一毫之不
慊為盡義盡善則四方咸悅後世取則光海卒
殺悌男囚永昌別處 太妃於異宮矣先生又
上劄曰昔周景王有賊臣擔括造亂欲立王子

佞夫佞夫不知擔括欲立已也未幾事發擔括
出奔尹言多劉毅等五人共殺佞夫非王命也
孔子書之曰天王殺其弟佞夫書法如是佞夫
之死初不出於景王特不之禁也然而左氏曰
罪在王也穀梁子曰甚之也杜預曰殘骨肉也
景王之過五大夫成之也今日之事其雜昧無
知又非但佞夫之不知也廷論不已必欲奉命
者又甚於景王之不之禁也欲使聖上將何以
有辭於天下後世也又言父子大恩以為其處
變皆有道理一失幾微釁累不可不審古之人

以過宮伏地積誠格君勉君今之言者以別宮
異處請之臣所未曉也深思古聖人烝烝之意
而慶之今日以舜之心為心毋變於前日之所
事者為舜亦不越乎此也時先生子樟在都下
恐禍及不上先生聞之又上劄曰臣有豚犬之
子恐臣必死不敢上臣教子無義罪實在臣重
焉以上光海不聰四十三年編次禮記喪禮分
類後二年冬廢母妃之議已成欲上疏極言聞
光海答柳滄疏有曰戊申鄭述首發全恩之說
以掠美名亂國是云先生知不可諫而乃止五

服沿革圖成四十九年正月居持敬齋寢疾至
五日朝則閱家禮會通夕時連呼席不正者三
侍者扶而正之反席而歿七十八歲前年伽倻
山崩卒之日泗上木稼弟子治喪禮一從儀禮
殯于明義齋二月三十日發引至蒼坪四月二
日乃葬貞夫人李氏合葬四方之士會葬者四
百六十餘人其八月光海致祭致賻如儀以先
生歿不即上聞故過時乃祭既三年門人立祠
檀淵泗陽竹林檜原皆有祠 哲皇帝天啓三
年我 憲文王即位賜祭追爵吏曹判書從祀

川谷祠後二年賜謚曰文穆勤學好問曰文抱
德執義曰穆 孝宗八年加贈領議政 顯宗
三年改葬于州北鎮山南麓蒼坪之墓四十四
年今 上三年諸生上疏改勤學好問之文為
道德博聞之文貞夫人李氏籍光州奉事樹之
女先先生十一年卒生一男三女男樟全羅道
都事壻三人校理姜縝奉事盧勝府使洪燦樟
生三男一女男惟熙惟熟惟燾惟熟惟燾皆初
仕為叅奉壻士人盧增先生少遊君子之門得
聞為學大方博學篤行克養既積坦而夷溫而

屬粹然德成一時四方學者翕然師宗之其教
人必以修身為本循序進學一以躡等為戒尤
謹於禮節威儀之則詳密周盡規模博大要歸
於精一無間至義精仁熟道益大德益全卓乎
孝悌通於神明忠義著於簡冊為教於百代者
亦可見為學之準則先生知聖人大業茂對時
育萬物與天地參一本於道德心術之要於是
作心經發揮篤於好古謂天叙天秩之典在禮
儀威儀三百三千周公儀禮戴氏禮記殘缺雖
多參之以歷代損益質之以宋儒諸說此五先

生禮說所以作也又改定冠儀婚儀葬儀契儀
其銘曰

溫溫之文翼翼之思博而致其廣約而盡其微
言而世為天下謨行而世為天下式惟德之偶
惟德之章惟德之則

桐溪行狀

曾大父司圃署別提 贈司憲府執義諱正

堅

大父 贈承政院左承旨諱淑

父成均進士 贈吏曹叅判諱惟明

別號陽先生

母貞夫人晉陽姜氏

將仕郎諱謹友之女高麗國子博士啓肅之後

也

公諱蘊字輝遠姓鄭氏其先本八溪郡人始祖
光儒侯諱倍傑光儒侯子孫昌大多達官貴人
今八溪之鄭皆祖光儒侯高麗時有為左散騎
常侍者諱習仁以直道顯事在麗史本傳七世
至嶧陽先生先生嘗受業於葛川林薰先生今
嶧川有鄉賢逸民之祠公嶧陽先生之次子也
明穆宗皇帝隆慶三年我昭敬大王二年
己巳二月六日公生于咸陰縣嶧洞里自孩提

有識事父母必承意順適一如成人之行既就學勤苦自力博讀經史行業日修十五六時法度已成好危坐對卷終日先先生隱居教授弟子日進皆莫之先也初見葛川先生名益賢先先生教訓有法未嘗崖異以為驚俗之行故公為學事親順而交友忠樂與人為善而臨事峻正鄉人父老皆敬憚之我 昭敬大王二十五年有倭寇兵革大起後四年先先生歿哭泣幾滅性雖在奔竄流離中持喪之節未嘗少懈既卒喪亂離未定事母夫人身親鄙事以供奉養

暇則讀書樂從當世之名人達者嘗遊月川寒
岡之門而初鄭仁弘持重名於南州接引江右
諸生號為來庵弟子而繩墨嚴切公亦嘗師事
之後上書梧里李文忠公深相識三十四年舉
進士其明年以行誼被薦又明年鄭仁弘攻柳
永慶得罪公從草野上疏訟之時有臨海君上
變事公抵仁弘書言臨海謀逆未著力陳全恩
事又論朋黨偏私之弊臨海君竟殺死而獄成
仁弘反有力焉時搢紳已有全恩之說而反目
之曰覬覦王室大臣杜門賢者屏跡矣廢主元

年己酉除 光陵叅奉不就後年又除奉慈殿
叅奉秋別試及第辛亥二月除侍講院兼說書
辭去秋又除兼說書尋復以說書召命再至乃
入謝其十月陞司書後月遷司諫院正言是年
昌德宮成移御未久有妖言以新宮不利於

上將還居慶運宮羣臣皆曰不可惡無辭時兩
宮已有間 太妃尚留慶運宮辭以問寢實欲
留居之公力爭言觸忌諱斥為鏡城判官自光
海以來用事者日以威福制人士大夫皆苟容
於朝諛佞成風無諤諤敢諫者及公以直言貶

人擬之鳳鳴朝陽鏡在絕塞窮北之境去王化
甚遠邊帥皆武人率多麤悍不法民多怨又前
年北路大侵鏡尤甚公近臣一朝左遷常退讓
無矜氣事主將有禮而御史臨民曲有恩愛服
窮乏革弊政其民大蘇以先王嘗欲易世子
廢主既得立以為大臣謀其事心德殺柳永慶
於是李爾瞻等亦自以為功力誇矜論功賞公
亦嘗力言鄭仁弘得罪事以故卒有召命為掌
樂院僉正自以無功上疏辭之爾瞻愠言曰此
其意以勲盟為不久也公以為徒無益乃止時

大獄繼起人人重足仄目雖牛馬之盜辭窮望
幸者以告變或得恩澤於是有死囚上變言金
梯男欲擁立永昌日夜為謀獄辭滋蔓搢紳大
陷於是用事者造為辭說以永昌一則曰奇貨
一則曰禍本爭言必殺以為功公見爾瞻曰孺
子之無知而尚有謀叛逆者乎且聞太妃日
夜憂泣恐不得偕死萬一不幸諸公尚有辭於
他日乎爾瞻厲聲曰亦且并廢太妃誰復有
不可者也怒欲起公笑曰毋起我且去矣遂絕
公益見世道危險蹤跡益踈欲以微故去嘗於

朝會犯憲令得劾罷奸臣既執國柄時事日亂
公鬱鬱欲一言感上意以為徒取禍無益且
念太夫人在嘿嘿常自傷一日侍太夫人具白
其所欲盡者大夫人曰勉之母以老母故變其
心公喜甚時公屏居已累月時議益非之不得
已一至都下而歸其月除成均館司藝以疾不
就冬又除侍講院弼善居講院月餘不與時議
相俯仰尋適付副司直彼啗怒日深構煽萬端
指為黨遂日夜陰察其所為前年永昌既禁閑
江都二月使府使鄭沆陰殺之聞者莫不憐悲

其死於是公乃上䟽極言勿釋實無謀叛狀鄭
沆迫之令死此 殿下假手於麤悍之武夫也
不殺鄭沆 殿下無面目立 先王之廟庭也
請追復爵位許以禮葬布告四方臣庶以昭
殿下友愛之本心又曰璣已死 殿下於 太
妃復何疑間之有如有姦細之徒交構兩宮者
宜付有司治之以大罪 殿下亦宜恭為子職
務得 太妃之懽心頃者鄭造尹訥丁好寬等
首發廢母后之議以圖其身之富貴為人臣是
可忍也請罪此三人者以正三綱五常之道䟽

凡累百言疏出莫不失色或有感激流涕者廢
主大怒下政院以凶疏不沮却上達承旨主納
者先罷而餘並推考於是三司請安置絕島廢
主曰往者故相李德馨上劄無人失言而三司
請按法今鄭蘊上疏其言大不道而以安置科
罪無君護黨如是甚矣三司請按法廢主雖甚
怒而惡殺諫者名故令諸大臣雜議必欲假羣
議而殺之也右議政鄭昌衍獻議爭之而原任
大臣李元翼沈喜壽等皆以為不可罪而時適
有大禮大臣持之卽不韜以故禍必弛然時議

益怒論之以大逆又令館學生徒等上疏請罪而鄭仁弘亦上劄以為其言不道必無赦以礪羣臣之為異議者云廢主乃大悅欲庭鞫領議政奇自獻曰鄭蘊不過狂妄無他罪不可鞫也廢主怒謂曰然則欲不鞫乎曰不可廢主曰且不問乎曰不可且曰此非叛逆大罪姑徐之右議政出仕然後議之廢主不得鞫猶按問然後復繫之至七月復按問命安置濟州之大靜公自三月逮繫至七月始出獄繫械已經春夏鏡父老聞之嘆曰此前日吾賢宰也民賴其賜甚

厚義不可負也來助患難湖南儒生宋興周等
亦上疏言無罪時直公者皆被譴而陷公者接
迹得顯仕爭相媒孽危禍日迫而公未嘗憂嘆
咨嗟常自若及庭訊廢主盛怒以待左右皆懼
公辭氣不亂慷慨愈切鄭沆亦對獄惶怖失次
既出遣人謝之因憂恨發病死丁好寬見其疏
深自恨曰吾為罪人矣日縱飲不食病醉乃死
大靜極南海中窮島自京城至海南千里自出
獄并日迫行六日到海南候風十九日海中阻
風又三十八日乃得達邑最地濕卑下多蟲蛇

毒螫自春夏之交或淫雨連月或盲風毒霧一日異變或窮冬不寒或盛暑不燠風氣與中土絕殊公咄咄曰宜負罪者居之自號鼓鼓子公既得罪而用事者益怒日令三司館學論之不己其九月焚其疏於闕下削名盟府李彥英姜大遂皆以論列得罪吳長指為黨人謫死朴明樽禁廢南士一言及寃者皆抵罪於是江右橫議皆主仁弘公既不悅於仁弘爭付者益激為禍人人反目其後果有廢母后事竒自獻知不可獨爭請廣收羣臣議竄北邊於是宗室貴臣

多竄逐而竟不得逞號曰西宮而已修撰尹知
敬自公得罪因不肯仕飲酒酣歌托於佯狂公
拘囚海島苦心勵行操守益堅時宋象仁李漢
皆得罪遷謫至此宋象仁彈碁李漢學琴以暢
其壹鬱而公常讀書於是證經史據前言上自
殷之末世下至南宋其間聖人賢人之困厄憂
患心危慮深不失其正者凡五十有九人輯為
德辨錄以自省又作元朝自警箴以囚徒日給
廩粟苦不繼令僕隸日傭賃取資天啓三年三
月上克大難釋公為司諫院獻納前時永昌

之獄 太妃家既族滅母盧夫人流濟州沒為
官婢至是召迎其奉使者來而具言其事且勞
苦曰盍一日撤棘以自便乎公辭不得命見有
旨然後乃出公居園籬十年嘗作園籬望北斗
詩白雲之歌聞者悲之既出鬚髮盡白涉海乞
先就老母時大夫人年已八十餘矣見者莫不
感歎泣下而大夫人曰今日乃得見吾兒耶執
手笑與語不一見遠別悲思之色人賢之曰有
是母然後有是子五月以司諫入謝因進言曰
禮悼與毫雖於其身親犯其惡不加刑焉鄭仁

弘八十耄荒之年被極刑死恐傷聖德而實則
親戚嫁禍昏老可哀又自以平日師事罪人自
辭太妃廢時仁弘雖為事首當議大臣多不
從知人心不與為兩端說曰君臣母子之名義
出天而不可易今之為殿下爭之者惜此名
義也臣獨未曉分府分曹分院有若兩朝廷兩
君上者然使忠實之士屯兵守之彼孀居一婦
不過飽荒中一箇人而已議未上其客聚謀以
禍福動其族類私易其語議遂決當時有竊言
者而弘當誅且欲自言云以故公上疏言之後

月有告廢世子掘地事合司請法公以前日骨肉之變微感上心忤羣議卽去大司憲吳允謙引避曰臣前日之啓幾誤殿下臣若執迷臣鄭蘊之罪人云其六月為南原都護府使冬特加通政入為吏曹叅議明年正月李适叛入京城上出幸公州二月李适敗死車駕還京賞扈從諸臣公陞嘉善拜刑曹叅判於是追贈三世爵位以親老乞歸冬為大司諫時有上變者諸囚或引仁城君亦知其謀於是三司請法公執全恩之論既不合因啓曰不問義理之

當否形迹之虛實一以獄辭而已告變始無虛
歲仁城雖除豈無仁城噫先王之子盡之矣廢
朝雖昏亂不殺骨肉不廢母后雖以 殿下之
盛德不能一朝居此位也三司之請適足為奸
人藉口之資耳非宗社長遠之計也後之視今
猶今之視前也卽適大司諫去明年三月復以
大司諫召之七月八謝尋遷承政院都承旨政
院故事承旨由同副以次例陞而今由諫院直
拜本職出於特恩據故例力辭 上不許尋賜
告歸九月又召至京師益求去以老母為言

上不許而令以老母來養公上䟽辭謝因自言
久為時論所排擯義不可苟進云時有宰相建
白以為材能多屈廣開庶孽之路而又以邊兵
不足納粟多游丁議悉發防邊公又曰此壞名
分失信歟怨於民極言之於是庶孽縱恣而士
大夫皆怒裁抑為計世法明年春賜告歸行出
畿甸上䟽自陳因論國君服私喪之禮請從羣
臣言時有啓運之喪而上斷行三年之制羣
臣多爭之不能得故因䟽及之四月以啓運葬
禮來拜刑曹叅判尋改大司憲上劄言民瘼於

是戶曹經用竭責四結出布布匹至四石極言
傷農病民以邦本為憂後月上以公有老母
特拜嶺南觀察使有獄事訟寃當理公至按覈
其事及啓聞有不悅者故以他事劾之其冬復
拜大司憲辭不至明年正月虜犯我西鄙自我
中興之後與虜絕和親益兵塞上以為戰守計
又有反間言姜弘立老母妻子皆已僇死弘立
深怨之謂朝廷於我已負實向導東犯云關西
節度使南以興既戰敗死之而平壤已潰報至
上出幸江都而世子分朝南下士大夫多三南

人多從分朝而或少年慕奇功者爭趨之既去
行在隔海頗遠於是奸人反造為疑間人心懼
之公聞亂出湖南道路騷動相傳虜已塞路必
不得達而皆以為分朝近且便公曰君有難觀
望非人臣義也直趨行在聞者義之而人心倚
以為重虜求和親必以王子重臣為質姜弘立
來公上疏言弘立背義負國罪當誅且虜不可
和仍論我兵力形勢曰但恐 殿下無堅定之
心而羣臣無自任者三月虜既成約誓而去公
以同知中樞移漢城府右尹入京城俄以兵曹

叅判返行在四月從 車駕還京上疏乞歸養
上勉留之五月以母病去自此數年之間為都
承旨為大司諫為大司憲皆不就己巳四月以
吏曹叅判一入謝而去明年三月 太廟之木
震 上自責求言公上疏曰臣聞獄刑者天下
之大命也獄刑不中則冤氣生之所以傷天地
之和召水旱之灾者也反正之後投竄四裔者
不知其幾何也罪人之多非國家之福也一夫
叩心有五月之霜一婦含冤致三年之旱况環
一國叩心含冤者不止一夫一婦而已者乎宜

命有司凡罪在當赦者霈然䟽滌無所係吝則亦弭災之一助也嗚呼凡人無辜尚如此况

先王之子乎珙之無罪臣已陳於前矣若使珙叛逆已著惟當置之絕島待之以不死則

殿

下罪罪親親之道可謂兩得而俱全矣臣竊為殿下惜之然死者已矣使其老妻穉兒尚在海島以綺紈膏粱之養而一朝飢寒困頓哀號而不恤幾何其不至於無噍類也天人相與之際甚可畏也人事失於下天變應於上殿下待骨肉如此災異之生不足怪也若不改圖災異

無時無而國不為國矣臣請追釋其寃復其封
爵還其子女令毋失其婚姻又曰 殿下寬之
既釋其母而母老子病戀戀不相離陳情乞留
臣聞之深感 殿下之仁而悲其不忍離之情
於是兩司交論以為附會災異眩亂是非劾之
時大夫人年九十三而公為六十二矣雖已貴
必躬親服養亦不以老故少懈兄弟二人皆老
相愛藹然其七月大夫人沒哀毀逾禮既葬廬
於墓側其居處哭泣賢者見之莫不曰君子之
善於禮也不肖者見之退自省猶恐其不盡於

反報也其葬在加祿之龍山去嶧洞七十里今山下有龍泉精舍公嘗曰古人曰養則觀其順也喪則觀其哀也祭則觀其敬而時也此三者某嘗見於先君子而某又得之於先君子云崇禎五年六月 仁穆王后升遐十月葬惠陵公入臨既發引歸其十一月拜大司諫辭疾不就明年春又以大司憲召之三月入謝時有以私怨上變者公論之諸被誣者皆赦而其上變者無罪公爭之不已四月以王子嘉禮 上命繕治昌慶宮公執不可 上從之五月遞授大護

軍陳情乞退

上不許而賜告歸秋仁政殿震

公居家上封事論君德以及灾異七年春拜吏

曹叅判夏改大司諫皆不至秋又為大司憲

上既承大統功臣等多以為上中興功德高

於列聖宜追尊考妣享之宗廟於是請於

帝既尊封謚方議祔廟典禮言者皆得罪而大

臣去位公適為諫官皆望公之一言九月公行

至龍仁改都承旨既入謝因上疏求去又論祔

廟失禮曰禮已孤暴貴不為父作謚先儒呂中

曰父之爵卑不當謚以已爵當謚而作之是以

已爵加其父欲尊而反卑之非所以致敬其親也 殿下追謚之舉已非至當之理而欲以非禮之禮躋祔於列聖之次昔漢宣帝追謚其所生父母曰悼考悼妣而置園邑入廟則未之聞也哀帝詔共皇去定陶之號立廟京師而亦未聞入廟也光武徙四親廟於章陵此則未嘗加謚曷嘗有入廟之議也胡氏論之曰王莽篡時漢祚已絕光武掃平禍亂奮然崛起雖祖高祖而帝四親於義未有大不可者一聞張純等建議斷然從之章陵四廟蔑有異等寡恩之誚不

聞於當時失禮之譏不生於後世宣哀之過舉
益明 殿下不法當法之光武而乃為宣哀之
所不為臣不能無憾於天地之大者也宋時歐
陽脩首發稱親之議呂誨目之曰邪論請下理
古人重繼世之統尊祖宗之義嚴矣臣謂別立
廟享無別於宗廟則 殿下尊親顯親之道盡
矣何必以過隆之禮加於不當加之地貽啟尊
反卑之譏乎又曰宣帝光武皆以孫繼祖綱目
不以不禰其禰為貶而先儒以為有異等為美
事疏入不下於是連辭逆都承旨旋拜同知經

筵又力辭疏三上卽去歸八年春有上變者獄
事連累及公 上令勿問而公猶待命月餘拜
大司諫卽入謝因求去不已六月 穆陵裕陵
皆有變大臣奉審二陵啓陳其狀而功臣等更
與大臣謀曰非震也因兩崩壞陵寢卽洪有一
反以誣罔得罪於是修陵之節未舉而禮曹消
吉以 章孝祔廟慶禮先行公上封事責大臣
之咎又斥言曰繕工提調臣景禎禮曹判書臣
瑞鳳掩匿災異以負 先王之恩而陷 殿下
於過舉也仍論罪人多枉以及估億健無罪請

哀憐骨肉之命時議大忤兩司交章論劾月餘
上竟不聽念久不受祿令該曹餽米饌以為周
給云公謝曰此 殿下不以薦耻待臣也尋移
禮曹叅判上䟽辭之時又有大風 宗廟社稷
之內拔木尤多上䟽論災異以及生民之困率
後園遊宴之娛 上優答之罷畿內關東量田
以待有年後日 上御經筵公入侍 上曰鄭
經世已死張顯光老矣卿不可去也公亦辭以
老病因對災變以及三南量田多欺罔其月遷
副提學連上章辭之其三䟽極言朋黨之弊前

古以來未有如此而不亡入之國者也又曰昔
宋神宗時范鎮年六十有三呂誨年五十有八
歐陽修年六十有二富弼年六十有八司馬光
王陶皆五十或致仕或引疾或求散地皆不容
於時議其去皆不拘大閑之年臣犬馬之齒已
過諸人而不容於時議則加甚臣來京師六月
在彈劾者三月忝禮曹者月餘又被攻擊因仍
苟冒終至顛躓雖被逋慢之罪臣恐不辭而去
也自此求去益力九月司諫趙綱言大臣之貪
汙得罪公上劄乞寬貸上從之嘗召對因進

曰殿下經筵日倦漸不如初上曰當勉之
後在經筵講齊風之東方未明辭謝曰禮君有
過則臣下固不憚譏刺也古者樹誹謗之木亦
此意也仍言三南量田多怨而必先賦三南三
南之民益多怨連爭之及與戶曹判書崔鳴吉
爭論於上前戶曹已頒新結於三南公曰此
法廟堂既與七路之民有一時頒行之約崔鳴
吉曰初無此約再詰之再匿之公不能辨出而
問之關已再下矣公乃上疏言之大臣不可竟
不行公又上疏曰一國之政不可或先而或後

一國之賦不可或重而或輕鳴吉必欲先賦三
南失三南之心方今南夷啓釁恐喝日至在我
預慮而熟計者唯在保全民心謀事之臣反促
之以怨毒之氣民既散去雖有器械誰與為禦
雖有城池誰與為守上不從遂去歸臨行又
上疏曰馮驩孟嘗君之一食客也猶能焚債卷
使薛民親君况臣不為馮驩而受恩之厚又不
止一食客而已乎孟子有言曰禮貌未衰而言
不合則去之古之人有事君不合而去者不可
一二數雖被負恩之誅非臣所怨悔也然豈敢

忘 殿下恩我國有緩急臣當赴難而死還鄉
里更無意仕進衣布茹蔬自同於閭巷之韋布
而未嘗如顯者九年正月八臨 仁烈王后之
喪前年去國之後爵祿猶在上疏辭之二月拜
禮曹叅判尋遷大司諫前後累辭政院皆不納
因上疏自陳時虜將僭位號虜使方來故其疏
又曰答書必峻絕斥之母令以我為藉口西徃
新叛中國父母之賊子雖不閉關絕之接之以
從胡之列不問其所從來被雖陽示之怒其心
必曰我有人三月移副提學上劄首言君德以

及當時之極獎又曰功臣握兵柄不念外禦幾
察日密將士解體狼顧脅息以為有功亦死無
功亦死故南以興臨死恨之曰吾為將在邊不
敢練一卒習一戰卒至於敗此悲痛之辭也由
今之道無變今之弊雖有孫吳之將不能為一
朝用也 殿下以此屬反正以此屬亡國夏改
大司憲以 長陵葬禮出謝尋自引嫌適既反
哭即歸六月拜吏曹叅判七月移副提學九月
又改大司憲十一月復為吏曹叅判不得已入
謝因求去不已 上不許以為遠客賜米鹽以

示加意而庖廩之人已怠矣十二月虜大舉來
侵長驅三日前鋒已過鳳山矣前年都元帥金
自點率大軍鎮井方據險自守而副元帥申景
瑗出行兵遇賊候騎軍散見擒上出幸江都
以宗廟社稷妃嬪諸姬先行賊已迫都城

上卽馳入南漠急百官多徒步從之而或道亡
申景禎率精兵數千騎馳過望見公呼曰事至
此是誰之過也公重臣何不一言以安社稷乎
公笑謝曰公率此勇士不擊賊將安用乎景
禎去曰若是哉迂也勤王之師連敗陷沒山城

受圍四十餘日公上劄請斬元帥以激礪將士
心時城中請成已久虜不許及崔鳴吉密啓

上往虜中公又上劄曰外間喧傳昨夜使臣之
行國書有稱臣之語可謂痛哭前後國書皆出
於鳴吉而其卑諂畏約實降書也然猶不稱臣
今若稱臣則是君臣也既為君臣而不從其令
則國亡矣鳴吉以為一稱臣則城圍可解也君
父可全也此婦寺之忠也况萬萬無此理自古
天下國家有不亡者乎虜無厭降亦亡不降亦
亡曷若守禮義死社稷乎况君臣父子背城一

戰萬一有完城之理我之於天朝有父子之恩
義不可背之虜既得我書責弁和者為言公聞
之請自往於是大臣往來議事夜軍亂守閤願
得弁和者以甘心云亂者皆出於三大將麾下
而獨守禦兵不動守禦將李時白曰吾非禁令
軍中軍中無從亂者三大將者申景禎領三手
具宏主摠戎元斗杓為御營將矣明日列書前
後諫臣十餘人崔鳴吉復往虜中有白上者
曰諸臣皆一時重望恐人心不服上命促反
之於是聞江都陷敗留都相金尚容自燒殺諸

王子妃嬪宗室貴臣妻妾子女皆以被驅而其
餘屠殺殆盡城中益無鬪志而虜攻城益急崔
鳴吉又至虜中約明日車駕下城公怒曰寧
亡國以君降虜吾耻之拔佩刀自刎刃沒腹中
矣城中皆大驚而莫不悲其義上令御醫視
之而命州官供給救之令必至於無死也
上將出城公殊而不絕猶仰首號曰鳴吉使
殿下出降虜將變易其舊求我傳國之瑞此受
之於大明相傳且三百年當獻之天朝不可許
也求助攻王師大明於我有父子之恩虜亦知

之子不可攻父亦不可教子攻父虜雖凶狡必
無辭而強之以此二者爭之母得罪於天下後
世二月昇至鄉里嘆曰主辱矣臣死已遲更以
何心與凡人齒供賦稅食妻子之養乎乃入金
孫山谷中披草為屋命曰鳩巢而耕山種秫以
自給於是國家不用皇明正朔故每歲換不復
近新曆日逸世絕俗花開草長以驗時序居山
中三十七甲子而沒崇禎十四年辛巳六月二
十一日也前年五月四日貞夫人尹氏沒葬於
居昌之主谷明年正月合葬焉後十年辛卯改

葬龍山趙學士綱曰古語曰君父至尊親也送其終也有時而既喪亂既久歷歲年多矣卿大夫安於朝士庶人安於野商賈安於市舉皆燔衣甘食而嬉娛先生離兄弟屏妻子獨處於窮山之中惡衣糲食冬夏而朝夕常以劓刖誓義不卽死於圍城負罪引慝不敢須臾忘千百載先生而已嗟乎嗟乎古之聖人賢人其心一也其所遇之時治亂不一而其事業不同當平世無善一世德及萬物功業昭于時當亂世或遁世獨行或殺身循義以傳於後其道行於時傳

後世一也試論聖人賢人在虞夏之盛德禹抑
洪水益烈山澤而焚之稷播五穀而不以為功
當殷之亡箕子被髮為狂比干剖心伯夷餓死
而無怨其事業不同而其心一也君子刻意勵
行而或不及學者孜孜日講而得之者蓋鮮矣
竊觀先生之道非其義不合非其道不就見義
不惑犯大亂而不懼守節取義視殺身如嗜欲
縶身迹隱舉世非之而無怨愠嗟乎嗟乎其與
古之聖人賢人者考之行事炳然皎著殆與日
月爭光者矣學者稱之曰桐溪先生而從祭於

龍門文獻廟公有子曰昌詩昌訓昌謨又有側
室子曰昌謹昌詩前工曹正郎生岐壽昌訓生
岐憲昌謨生岐胤其餘子女皆幼陽川許穆狀

記言卷之三十九終

記言卷之四十 東序記言

輔國崇祿大夫行判中樞府事趙龍洲謚

狀

原任判中樞趙公諱綱字日章姓趙氏本漢陽人始祖高麗僉議中書事之壽其後搃管暉搃管良琪禮儀判書暉漢山伯仁璧右議政洵同敦寧嬖自始祖顯者七世號為大族曾王父贈吏曹叅判壽崑王父贈吏曹判書玆父贈左贊成翼男二世皆以行藝聞母貞敬夫人柳氏籍文化贈承政院左承旨愷之女也三

世封 贈皆以公貴也明 顯皇帝萬曆十四

年十月六日公生柳夫人賢教育有方一以古
人訓子者為法生五年始就學甫十年已有成
人儀式又專心讀書無他遊戲嗜好十三柳夫
人歿其持喪禮式一如成人明年皇考贊成公
聘宋夫人夫人父宋公嘆之曰他日童子必貴
家當受厚報弱冠文詞已蔚然有聲公亦以文
學能自任為重白沙李相國恒福車太常天輅
皆許以為奇才二十七選成均進士明年贊成
公疾甚公迎醫湯藥色憂不怠歿則哀毀逾禮

守塚三年其哭泣之哀居處之嚴簞粥蔬食之
節君子以為能盡於禮也贊成公疾病思食柿
以過節不得進終其身不忍食柿李爾瞻素聞
其名欲與之私相善以為守禮之士非禮不可
必加禮厚奉給遂欲深結之也及光海政亂爾
瞻方用事人人仄目畏忌公遂絕之仍不復應
舉寓居嶺南之居昌以避世癸亥 仁祖克大
難收召才學士公以遺逸召拜高敞縣監尋改
慶尚都事皆不就甲子以刑曹佐郎為木川縣
監問民瘼修學教邑稱治明年去歸丙寅 上

親試士公擢壯元連在兩司丁卯建奴東搶前
年國家始行號牌法寇至平壤民解號牌掛之
城堞即皆散去時公為司書與文學金堦上疏
言罷號牌以收人心於是罷號牌法 上出幸
江都令世子撫軍湖南公從之奴既約成而去
以持平上疏言功臣縱橫不受 命湖西節度
使琳緒 先王之陵以厚賂輕宥諫官尹煌以
斥和忤 上旨吏曹阿縱 上輒擬奏聞書狀
仍罪狀姜弘立疏奏適持平戊辰以修撰論崔
鳴吉別廟之非已巳以獻納改副校理尋賜暇

書堂其六月政院以暑月請停視事公與諸學士上劄曰政院以暑月請停視事此雖古事臣等以為過矣雖國家無事論者猶以為不可況危急存亡之秋乎有謨猷者徘徊於是好廷爭者徘徊於是借前箸者徘徊於是士傳民語者徘徊於是工執藝事者徘徊於是損國體而損人遠者為不少矣考之月令夏月君子齊戒節嗜慾定心氣然則安肆於宦官官妾之上不可謂齊戒節嗜慾定心氣未必不生於講論經傳之間也冬拜待平先是有大獄事連仁城君瑛

睦性善柳碩上疏言全恩事大司憲金尚憲論
以護送僚議多不從乃引避公啓曰昔在昏
朝陷人必以護送尚憲於其時仰屋竊歎者久
矣不意今者身自蹈之也請遶尚憲玉堂請並
遶兩司上特命綱勿遶也公乃再引避而遶
庚午以修撰為吏曹佐郎辛未以獻納復為吏
曹陞正郎以章廟追尊事上怒爭論者玉
堂官五人下理治之公上疏極言其不可罪又
曰殿下顯親之誠不幾於反歸喪亡之轍乎
臣嘗在玉堂時追崇之論與諸臣所言無異同

辭語之不遜抑有過焉請均被其罪不報尋改
副校理與同僚吳堦等上劄論典禮之非有
特命除知禮縣監兩司爭論請留上曰頃者
絀有嚴勲舊辱大臣抑追崇之罪而愛其清儉
不以罪罪之當論以重罪兩司恐懼不復敢請
留至堂猶爭執不已上任之明年統制使滄
因括丁督責多無狀公棄歸因滄啓卒就理坐
罷癸酉復為吏曹正郎甲戌為司諫時典禮爭
論諸臣皆已得罪公啓上曰臣愚見實是被
罪諸臣之言而臣適其時不在言責則為今日

附明諸臣其時適當言責則為今日黜幽彼幽
此明臣實着之光海之追恭嬪主八廟賊義
之大者而其時果有一人苦口爭之如今日者
乎有言順乎 殿下則榮寵隨之有言逆于
殿下則罪黜及之宜乎諂佞駕而忠言伏也自
古及今亡國敗家恒由於斯孰謂 殿下之過
孝轉成亡國之堯至於此哉乙亥為執義因洛
水絕流大風拔木 穆陵 裕陵有變上疏言
遊宴選後宮及營作事曰以 殿下之聰明獨
不覺悟行之不疑豈天誘 殿下之衷終歸於

亂亡而後已歟遂適執義九月復為執義以監
試不法爭論罷榜事上不聽大司憲金尚憲
寢其啓公引避不出王堂帝之上特出為
文川郡守副提學鄭蘊上劄曰殿下以綱為
何人也其人篤行孝友清苦自守又其文學博
覽可以置左右而備顧問者也其可以一言過
戇而遽示好惡之私耶上從之拜軍器正
命廉問湖南郡縣既復命上稱之曰綱出入
民間細知守令治否民生疾苦諸御史不如丙
子以司諫應旨上封事言大君田宅踰制

章陵殯殿事實格無法仍及左相洪瑞鳳受賂
賣官之誚歷舉李大厦納馬事請因災異黜墨
相飭過愆以為應天之實上不納瑞鳳子命
一與大厦皆上疏請問之上問于大臣右相
李弘胄以為前者或有令政院召問之時領敦
寧金尚容以為絅已適諫官王府事嚴可以召
問也上令政院問之公對曰大厦納馬事不
得諱於其鄉亦非一人所知臣雖鴛劣告引也
人以證其言國朝二百年無此事臣何畏沒
身之罪以開告引之門也昔燈籠錦事唐介之

風聞而賢如彥博猶且面斥上前彥博拜謝而
已未聞教子自明仁宗雖貶唐介亦未聞詰問
也臣之所聞比唐介為左切而瑞鳳之貪濫不
止受一馬而已封事所論特舉近事耳大厦一
馬何有哉大厦盜善馬以賂權宰事覺則豈不
欲以死自掩乎禁府以不言其人請令大臣更
議領相塗右相弘胄皆掩匿覆蓋而猶畏言亦
莫之敢顯言下理也 上令從領敦寧議問之
公即就吏同義禁閔馨男上疏曰囚諫官國朝
二百年未之有也 經筵官俞伯曾亦啓 上

曰綱以言責下理前時柳永慶不能因鄭仁弘
李爾瞻不敢殺尹善道豈意今日有此事也是
促亡國之事也 上曰囚之者大臣也伯曾曰
殿下何以從大臣之言也舉國莫不憤憤言此
事也此而鞫之雖有權奸誰有為 殿下言之
也 上曰明太祖黜孟子之享非以為不賢也
特試群臣也今囚綱非不知是非也亦欲試之
又曰請鞫者未知其意欲何為也伯曾謝曰
殿下既已明審良慰良慰金尚憲上疏力攻伯
曾又曰瑞鳳嘗言綱不正及其人在相位綱自

疑見斥擴無實語欲一刺洞貫云而公實無此
事也 上不荅明日 教曰予雖昏暗長君也
臣下安敢挾憾相毀惟意所欲若是尚憲遠吏
曹判書伯曾亦適 上已知公忠直無他而瑞
鳳以功臣 上寵待之殊甚至此欲安其心為
之寬假而公亦不問而釋之其十二月奴大舉
入寇急 上將幸江都奴先鋒已迫王城 上
馳入南漢丁丑二月南漢既解圍廟堂以介和
者十臣議罪以公安言詆廟堂亦在議中都承
旨李景奭白 上曰綱善類也亦以此罪之人

心不服後世亦必有議之者 上曰予亦以為

不可其勿罪也戊寅以司諫入謝 上引見文

政殿公問 上曰今日之事欲石晉之於耶律

德光耶抑欲句踐之於吳耶 上曰為宗社生

民忘予之耻辱也公仍陳句踐報吳之事又曰

人心或以為朝廷與中國絕矣通信中國以示

不忘之義善也 上曰事秘外方莫知也已先

之矣仍言分兵農廣屯田去浮華開言路為今

日之急務云功臣峻竊畜宮人無敢言者而公

劾其罪狀乞養為興海臺臣 啓上曰綱鯁直

在朝廷則繩愆糾邪補益甚多不可出外 上
曰其情切矣可遣之時臺諫劾金尚憲詎死沾
名不從 上出城請罪客有問之者公曰當
車駕出城立節者鄭蘊金尚憲兩人而已可褒
不可罪也已卯謝歸居昌庚辰以司諫上疏進
時務十策其六月弟緹死時寓居新坪後月返
葬抱川緹秀而早夭有穉弱子威明甚憐之懷
哺教育登第方為湖西觀察使者也壬午以典
翰入謝以母病歸癸未差日本通信副使日本
關白源家光生子號為若君而請使於我矣公

入謝復為典翰二月受命三月至釜山候風

四月始行舟七月至其國自釜山水陸四千里

既傳命大設宴享使其俗呈變幻濫巧奇恠

百戲以為盛觀公不為一顧也倭人甚嚴憚之

不復敢呈其濫技訟道留館餽遺皆不受十一

月還釜山對馬島主宗義成者顧巧儉回多不

信公不色假待之甚嚴義成恚不假借因書契

頗致毀言朝廷却之有日本記行關白說既復

命謝歸明年賞遠使勞陞通政拜刑曹參議辭

不就冬為金堤郡守入謝大臣白上令憚壓

道內移全州府尹公簡嚴判官奇震興者素心
憚之陰懇於方伯責以衙眷濫率公即去歸上
任才十八日公有亡弟寡妻穉子以大夫人不
忍離故公請於朝以從此所謂濫率者也乙酉
奔哭昭顯世子拜大司諫上䟽言生民之困庠
災異變恠宮禁近習貨賂視朝倦怠事仍陳勸
戒累千言上深納之以為至論有內獄令宦
官主治之又上䟽曰掖庭有獄始於漢時衰國
之治宜付有司以示聖人無私之治仍言宮禁
不清上從之而適拜大司成以母病歸移拜

刑曹叅判尋改大司憲 上賜姜氏死公在牙

山上二封事其一辭無勞進階事也其二姜氏

不可賜死事也疏入遼大司憲尼山有上變事

上遣將出兵即入京仍拜吏曹叅判又以母病

歸拜大提學辭不許又拜大司諫上疏辭之且

曰興王賞諫衰世厭諫亡國殺諫 殿下聽諫

之道漸急不惟急而已抑制之摧折之竄逐之

躬駕而隨衰亂之迹何也仍言趙錫胤李應署

事疏入 命遙職丁亥拜大司諫未謝陞刑曹

判書上疏辭謝仍陳賑飢民蠲民役擇邊將警

天怒又言李景興洪茂績沈膺李應著事尋移
拜禮曹判書無裁省事以歲飢嘗請蠲民役
上從之令掌其事蠲大小煩費以便民改吏曹
判書連辭不許恢公道抑奔競申明守令薦舉
法因入侍言昭顯三兒放還事上引見大
臣大臣多言馨長為國盡忠狀公曰馨長謂之
繡縫國事則猶可言以為盡忠則不可上領
之曰此言是也馨長驕橫無所忌巨室多以貨
利交驩傾事之馨長初以商賈事命壽命壽者
本西邑官屬賤人以倖僂事九王甚信愛之而

我且厚賂以終其所為者久矣國之大事小事
命壽皆知之實馨長輸款云冬此使來館伴李
行遠稱疾不出大臣白上以公代之命壽見
公以私問曰昭顯三兒安在九王欲取育之公
正色曰下國事上國何可與知有此云云也累
問累不答命壽愠色而止不復言三兒事矣戊
子拜左叅贊命壽恒言恚怒公不已公聞之以
為貽國之患上疏請免文衡備局之任命壽三
兒之問蓋已有竊知者矣嘗引對言鄭蘊耻不
遂決死屏居深山自同頭陀甘自苦以終其身

當褒賞其忠又上疏言之移大司憲時南方大水進脩省疏累千言金自點以功臣特恩用事積威福二十年公卿以下多畏事之莫敢抗當試士公以大提學掌試士諸參考官有媚自點者欲以其孫置之壯元公曰壯元非人望不可言者不敢復言然皆失色公前為吏曹自點子鉉藉其父勢求為郎郎僚多推薦之者而公竟不許至是自點既積怒於公人多為公惧之公終不少假已丑以刑曹判書遷右叅贊五月上有疾公掌太醫院事及大漸公入侍而

薨自點引古事欲撰遺教公曰無遺 命而撰

遺教不可及 孝宗嗣位撰踐祚頒教文有內

旨為大喪聚女巫陳巫事謂之宮中古事云公

上疏曰先王之法假鬼神以疑衆者誅 大行

大王臨御二十有餘年一心履正一不作受禱

祈祝之事四方庭庶之所共聞者也今若使巫

覲執挺蒯肆其誕妄以為為 先王除不祥且

以為宮中古事不可廢云爾則不幾於誣先王

之大者乎亟下明教斥絕此巫事自點以罪免

相公卜相仍為吏曹判書李惟泰者上疏搆誣

二三士類詆毀公尤甚公三上疏適吏曹為禮
曹判書 上對群臣言惟泰以此人為小人非
言人也公嘗在憲府論元斗杓樹黨要權惟泰
執此攻擊云九月在 葬禮賁禮虞卒哭辭適
大提學為右叅贊以撰 長陵誌石文進正憲
庚寅北使來以查問為言宦者羅業還自燕與
使者俱來密 啓查問奏文表文云公曰奏文
表文主文者任其責請免官使者至會三公六
卿政院兩司既坐列饋以駱漿公獨不受也使
者有溫色責問曰前年吊祭 大行王無哭何

也公曰此在五禮儀使者既無辭又曰謝表不
及皇父王致吊何也製表者為誰問承文院俞
蔡而無職在外曰製表先見表者為誰公徐言
曰大提學先見之以此為咎我且任之命壽以
使者意言令本國議罪首相李景奭以奏文事
亦坐責議罪謂之兩臣云命壽私令兩臣安置
白馬 上特慰諭之各賜物以資行李令公路
厚送之四月至白馬在義州南山極高常多霧
無霧常風孟夏寒氣如冬公常讀書使者與義
順公主偕行過州遣兩胡婢至傍侍人驚怖無

人色公夷然不以為意秋義順護行使臣元斗
初狀 啓言攝王於兩臣語意凶悍專以修城
池鍊甲卒懷二心叛我為言云及使還且 啓
曰兩臣事彼不但已也欲全之事危矣 上為
之泣下議遣使卞明及引見大臣議事 上曰
卞明兩臣事無偏輕偏重適有使者來而卞明
事已使者至勅書但言修城集兵原與倭無涉
尚與朕為難而已無決語命壽曰大君使來則
事釋矣前月大君還自燕矣 上必欲遣之而
大君亦請行 上問邊地苦寒厚賜之閏十一

月貞敬夫人歿右相李時白白上令有司賜
賻物又令本道成發引葬埋之禮後月大君使
還許兩臣放還而永不叙用上復使人厚賜
之曰聞北京先報喜不可言公既還上䟽言誤
事貽國之辱又言西土人心風俗薦士二人鄭
麟壽韓翼文皆以才行聞者也上即引見令
以軍職在都下而公乞歸田里以修史事召之
公辭以清人責言未已應旨上封事言時弊仍
及朴彭年等旋表事鄭蘊贈謚事癸巳乞養
為淮陽明年三月遊楓岳後月謝歸冬畿甸之

丙腥霧四塞上疏曰自金弘郁下獄死君道日
元國事日非災異日見人心日離忠言讜論絕
影於殿下之庭是將歸之於天歟歸之於人
歟上曰愛君憂國老而彌篤乙未春公七十
以耆老上令本道賜米肉至明年春又賜之
及秋又賜月俸曰綱以先朝老臣逢時艱迫
坎壈在外家貧親老庚癸之急可知而何無一
入言之也公上疏辭不受疏十上而上終不
許八月有大風領敦寧金墉上灾異疏上怒
惶懼不知所出公上疏曰金墉言天警之可畏

人心之離合真宰相之言

殿下何故拒之至

此也其退黜摧沮死生固不足言

殿下有何

大不平柴于中而有此心病也古之聖帝明王

遭險阻艱難者何限然未聞以勞苦倦勤而致

心病者也又曰從命而利於君者順也從命而

不利於君者諂也達於命而利於君者忠也從

唯唯而退自以為售才見能者今日之激天召

災未必不由於此也上以為處猷猷不忘諫

忠臣義也丁酉沈大亨俞榮以議謚事得罪公

上疏曰前時上宣祖謚號尹根壽卞祖宗之

義鄭經世請改 宣祖謚號大孚祖述二臣之
言二臣無罪而大孚廢錮臣恐日月之明或未
遍也俞蔡徒知遇事盡言不自覺其陷於妄言
之罪亦非負國者也戊戌耆老所作五老會領
議政金瑱七十九判中樞尹垕九十二海恩君
尹履之八十公七十三判書吳竣七十二上
體不安既月始瘳上疏進清心寡欲之戒曰節
飲食少思慮戒耳目之欲為調攝少愈之戒云
己亥五月 上登遐公入哭既成服而歸承命
製謚冊文進崇政冬乞致仕下吏曹判書宋浚

吉沮之庚子上疏言賑飢事進暑隆荒政考請
免月俸不許辛丑拜判中樞辭不許春夏大旱
上避正殿理冤獄下教求言時以製太王
太后玉冊文召之連上疏辭之仍言尹善道事
曰善道之罪何罪也善道之罪惟以宗統嫡統
為孝廟左袒也當善道投疏之日誰為殿
下進焚疏之策也高麗恭愍王焚李存吾之疏
光海焚鄭蘊之疏恭愍光海非亂亡之主乎今
日廷臣自許非沒沒而不以堯舜之道導殿
下而反以亂亡之轍引殿下何也如異日國

史書之野史記之以為某朝某時焚尹善道論
禮之疏其為聖德之累何如哉臣恐後之視
今猶今之視昔也 殿下如大覺悟而明辨宗
統嫡統昭載先王實錄使後之論禮者不敢
為異辭則求之神道豈遠人情哉我祖宗陟
降之靈和豫於冥冥之中收譴為祥變旱為霖
使 殿下長保我子孫黎民其德不既大於走
群望而望報乎承旨南龍翼先 啓以為綱挾
護善道請張陰慘激 上意令 上不納而三
司攻擊大起請削職黜外 上命罷職而已領

相鄭太和曰綱身處畎畝斥黜無損於其身有損於國也左相沈之源曰綱以三朝元老應旨進言卒以此得罪此亡國之事也尹飛卿郭之欽等媚事用事者爭以攻擊為功論以遠竄自四月至六月上終不聽方群小用事讒害日至戒家人子弟口不言時事亦無一幾微見於色詞八月遊白雲山甲辰四月觀三釜瀑水積淵水石是夏始有叙用之命明年夏上幸溫泉還進箴以陳戒于上時公八十執義吳始壽白上曰綱三朝老臣先王特賜月俸

今論事一不當而輒廢棄之月俸亦收且綱今
年八十 上命中外八十以上者無論有官無
官皆有賞資而獨不及於綱 上命加資仍賜
月俸於是進崇祿三司攻擊復起以為月俸不
可許 上不聽公力辭月俸三上疏乃許十二
月大夫人卒公八十居憂送終之節皆可為百
代之行也戊申夏有曾為侍從者其父母年七
十以上者皆賞賜或加資之 命男威鳳嘗為
諫院以故進輔國八月遊白雲山將仍遊紫雲
泉石至文巖入山中數日聞 上有溫泉之幸

乃還明年二月五日卒公春秋八十四襲用深
衣幅巾既殮殯於外寢之中堂訃聞上為之
罷朝巷市二日四月己卯葬于鹿門東麓南向
之原在先壠北十里今上二年丙辰春同副
承旨金德遠請贈爵事左相權大運亦力陳之
上命追贈議政府領議政公簡靜莊敬寡言動
有法度粹然德全自修身親親以至仁民利物
善俗之治一本於經學以此事親以此教家以
此事君以此與朋友交可以居高位可以抑妖
妄可以禁邪偽可以使絕國可以處急難故其

文章博於百家精深簡切不誇不媚古雅可法
筆法勁正簡古蓋皆才藝之出於心者然也既
義直理正又其見於辭氣者溫而栗直而平尚
禮讓重冠婚喪祭篤於人倫此君子之盛節公
早失父母繼母宋夫人年高公事之必樂其心
忘安其寢處飲食忠養公已八十顏色不怠宋
夫人與子孫言必稱薛公之賢公歷仕三朝一
以古人事君者事君能不有其身犯而無隱雖
累召累斥上知勤上節儉對群臣言之及事
孝宗眷遇益隆每稱之曰君子人公自通籍於

朝成已立名四十餘年遭時艱迭連被擯斥
朝不十年公亦謝寵辭榮閑暇田園二十年
其心之所樂而爵祿不入於心既年益高德
邵為國人士大夫之矜式自我純孝以來
人而已性澹然不樂滛技玩好服食有節居
有禮言不及貨利聲色遊娛常以嗜欲為戒
墨嚴正善與人忠愛亦不見私喜私怒人皆
畏愈久而不敢怠當寧陵內陷之變奉審諸
臣專掩匿不以實聞男威鳳為修撰上䟽極言
上覺之下教曰前後奉審之臣其罪難逃封陵

時監童諸臣皆拿鞠定罪一時以為趙氏有子
宅前有溪潭曰卧龍潭自號曰龍洲又常對錦
柱山亦曰柱峯老人今其遺文在子孫皆可傳
於後世一代宗儒碩士名卿鉅公其立言行事
刻之墓道者尤多略撮其家狀以請易名之典
大匡輔國崇祿大夫議政府右議政兼領經
筵事監春秋館事許穆謹狀

龍洲神道碑

公諱綱字日章姓趙氏本漢陽人趙氏始大於
高麗有僉議中書事之壽是為始祖中書二世

言書卷之四
日暉曰良琪皆為雙城總管又三世禮儀判書
暉漢山伯仁璧右議政洵皆以功烈貴議政相
太宗謚良敬於公為七世祖曾祖折衝將軍

贈吏曹叅判壽崑祖工曹佐郎 贈吏曹判書

玆父司贍寺奉事 贈議政府左贊成翼男二

世皆以行藝特聞母 贈貞敬夫人柳氏籍文

化 贈承政院左承旨愷之女也萬曆十四年

十月六日公生於漢陽之崇教坊柳夫人賢教

養有方生五年始就學十年學既通能自力讀

書亦無他嗜好遊戲十三柳夫人歿其居喪毀

感一如成人明年贊成公聘宋夫人夫人父宋
公見之嘆曰他日童子必貴家當受厚報弱冠
文詞蔚然有聲白沙李相國恒福車太常天輅
皆許以為奇才二十七選司馬試明年四月贊
成公歿李爾瞻已貴欲與之私相善久矣知公
居喪之節以為守禮之士非禮不可必加禮厚
奉給遂欲深結之也及光海政亂爾瞻用事日
久公絕之歸嶺南之居昌不復應舉以避世癸
亥仁祖克大難收召才學士公以遺逸連為
高敞縣監慶尚都事皆不就明年以刑曹佐郎

為木川縣監問民瘼修學教邑稱治一年去歸
丙寅上親試士公擢為壯元連在兩司丁卯
建奴東搶連陷安州平壤前年國家始行號牌
法寇至平壤民去號牌掛之城堞而皆散去時
公為司書與文學金堦上疏言罷號牌以收人
心於是罷號牌法上出幸江都令世子撫軍
湖外公從之奴既約成而去公以持平上疏言
功臣縱橫不受命湖西節度使琳緒先王之
陵以厚賂輕宥諫官尹煌以斥和忤上旨吏
曹阿縱上輒擬奏聞書狀仍罪狀姜弘立疏

奏適持平戊辰以校理論崔鳴吉別廟之非為
養乞縣不報選入書堂辭不報復為持平先是
有大獄事連仁城君珙睦性善柳碩上疏言全
恩事大司憲金尚憲論以護逆以僚議不可引
避公啓上曰昔在昏朝陷人必以護逆其時
尚憲仰屋竊嘆者久矣不意今者身自蹈之也
請適尚憲王堂請兩適之上特命某勿適也
公再引避乃適辛未以獻納移吏曹佐郎尋陞
正郎以章廟追尊事上怒爭論者王堂官
五人下理治之公上疏曰殿下顯親之道不

幾於喪亡之轍乎臣嘗在玉堂斥追崇之論與諸臣無異請均被其罪不報尋改副校理與諸僚吳遵等上劄論典禮之非上特出為知禮縣監兩司爭論請留上怒恐懼不復敢言至堂猶論執不已上任之明年統制使滄因括丁督責多無狀公棄歸因滄啓卒就理坐罷癸酉復為吏曹正郎乙亥為執義因洛水絕流大風拔木穆陵裕陵有變上䟽言遊宴選後宮及營作事曰以殿下之明聖獨不覺悟行之不疑豈天誘殿下之衷終歸於亡國而後已歟

適執義尋復為執義以監試不法論罷榜事

上不聽大司憲金尚憲寢其 啓公引避玉堂

上劄適之 上又特出為文川郡守副提學鄭

蘊上劄諫曰 殿下以某為何人也其人篤行

孝友清苦自守又其文學博覽可以置左右備

顧問者也其可以一言過戇而遽示好惡之私

也 上從之拜軍器寺正以繡衣出湖南既復

命 上曰某出入民間細知守令政治民生疾

苦諸御史不如丙子以司諫應 旨上封事言

王子田宅踰制 章陵殯殿事賞格無法仍及

左相洪瑞鳳受賂賣爵歷舉武人李大厦納馬
事請因灾異黜墨相飭過愆以為應天之實

上不納瑞鳳子命一與大厦上疏請問 上令

政院召問之公對曰大厦納馬事不得諱於其

鄉傳者非一人臣雖駑劣告引他人以證其言

國朝二百年諫官無此事昔燈籠錦事唐介之

風聞賢如彥博猶且面斥上前彥博拜謝而已

未聞使其子自明也仁宗雖貶唐介亦未聞詰

問也臣之所聞比唐介為尤切而瑞鳳之貪汙

又不止受一馬而已因歷舉瑞鳳父子貪縱無

忌狀有大臣以為某已適諫官王府事嚴可以
召問也遂下理同義禁閤馨男上疏言囚諫官
國朝二百年未之有也 經筵官俞伯曾亦為
上言之 上曰囚之者大臣也伯曾曰 殿下
何以從大臣之言也國人莫不憤憤言此事也
金尚憲上疏力攻伯曾仍言某既不直於瑞鳳
及其人在相位自疑見斥撫無實語欲一刺洞
貫云公實無不直於瑞鳳事也 上不荅明日
教曰尚憲挾憾相毀其言之憤怒寒心吏曹判
書尚憲適職伯曾亦適 上已知公忠直無他

而瑞鳳以元功 上寵待之殊甚為之寬假之
公亦不問而釋之丁丑南漢解圍廟堂以斥和
者十臣議罪以公嘗妄言詆廟堂亦在議中都
承旨李景奭啓 上曰此人善類亦以此罪此
人人心不服 上曰予亦以為不可勿罪也戊
寅以司諫入謝 上引見文政殿言國家之耻
辱仍白 上曰人心或以為朝廷與中國已絕
矣通信中國以示不忘之義 上曰事秘人莫
知也已先之矣為養乞郡為興海臺臣以為某
勁直在朝廷則繩愆糾邪補益甚多不宜在外

上曰其情切矣可遣之時臺諫論劾金尚憲詐
死沽名不從上出城客有問之者公曰當
車駕出城特立者鄭蘊金尚憲二人而已可廢
不可罪也已卯謝歸居昌庚辰又以司諫上疏
進時務十策癸未差日本通信副使自金山水
陸行四千里至其國都既傳命大享使呈變幻
淫巧奇怪百戲以私其喜心公不為一顧也倭
人心嚴憚之不復敢逞其淫技以途留館饋遺
皆不受有日本記行關白說還至金山馬島主
宗義成者傾巧儉回多不信公不色假辭受有

義義成心慙恚之因書契頗致毀言朝廷却之
既復命賞遠使勞陞通政拜刑曹叅議辭不
就尋為金堤郡守大臣白上令憚壓道內移
全州府尹其判官竒震興者素畏惡之陰懇於
方伯責以衙屬太濫公即去歸牙山上任才十
八日公有亡弟寡妻穉兒太夫人不忍離故公
請於朝以從以故云乙酉五月奔哭昭顯世子
拜大司諫上䟽言生民之困瘁災異變怪近習
貨賂視朝倦怠事仍陳勸戒累千言上深納
之以為至論有內獄令宦官主治之又上䟽曰

掖庭有獄始於漢時衰國之治宜付有司使政
刑出一以示太公無私之治又言清官禁絕貨
賂上從之而適拜大司成以母病歸尋特拜
刑曹叅判移大司憲上賜姜氏死公上二封
事一辭進階事也一姜氏不可賜死事也疏奏
適大司憲尼山有上變事上令出兵公即入
京仍拜吏曹叅判又以母病歸拜大提學仍為
大司諫上疏辭之又言李應著趙錫胤事曰
殿下聽諫漸怠不惟怠而已抑制之摧折之竄
逐之自蔽耳目之聰明適大司諫丁亥以都承

旨後大司諫未謝特拜刑曹判書上疏辭之因
陳時務請寬赦言事者李敬輿洪茂績沈膺李
應著等以開言路尋改禮曹判書兼裁省事以
歲饑嘗請蠲民役以寬之上令無掌之蠲大
小煩費以便民遷吏曹判書連辭不許恢公道
抑奔競申明守令爲舉法因冬月大雷白上
曰昭顯三兒何大罪置之海島之中也請赦還
上不聽一日引見大臣大臣多言馨長爲國盡
忠伏公曰馨長謂之彌縫國事則猶可謂之盡
忠則不可上頷之曰此言是也馨長初以商

賈厚事命壽得操縱之勢縱橫無忌憚巨室多
傾事之命壽本西邑官屬下賤俘虜徒以口舌
竊國陰事私婬於九王者也方今國之大事小
事命壽皆知之馨長實輸款云其年北使來館
伴李竹遠稱疾不出大臣白上以公代之命
壽見公私問曰昭顯三兒安在九王欲取育之
公正色曰下國事上國何可預知而有此云云
也命壽累問累不荅命壽愠色而止不復言三
兒事矣命壽恒言恚怒公不已公聞之以為貽
患於國上䟽請免文衡籌司之任命壽三兒之

問蓋已有竊知之者戊子遷左叅贊因引對言
鄭蘊耻不遂決死屏居深山之中自同頭陀甘
自苦以終其身其忠可賞又上疏言之不報移
大司憲時南方大水上海省疏累千餘言己丑
五月 上有疾公掌內醫院事及大漸入侍而
上薨大臣引古事欲撰遺教公曰無遺命而撰
遺教不可既成服有 內旨為 大喪聚女巫
作祈禳之事謂之宮中古事公曰先王之法假
鬼神以疑衆者誅上疏斥之自點以罪免相公
卜相仍為吏曹判書李維泰者上疏詆斥二三

士類詆毀公尤甚公嘗在憲府論元斗杓樹黨
要權維泰執此攻擊云公三上疏遶吏曹上
對群臣言維泰以此人為小人非吉人為禮曹
判書其九月莅葬禮贊禮虞卒哭辭遶大提學
為左叅贊以撰長陵誌石文進正憲庚寅北使
來以查問事為言既至會三公六卿政院兩司
既列坐饋以駱漿公獨不受也使者有愠色責
問前年吊祭大行王無哭何也公曰事在五禮
儀使者無辭又曰謝表不及皇父王致吊何也
撰表者為誰問承文院俞祭而方無職在外又

問撰表而先見表者為誰公徐言曰大提學先見之以此為咎我且任之領議政李景奭以奏文事亦坐責命壽以使者意言令本國議罪而私使之安置白馬 上為之厚賜之以資行且令沿道厚送之白馬在義州南山極高恒霧少日無霧則恒風四月寒氣如冬元斗杓使至燕狀啓言攝王於兩臣事專言懷貳心叛我云及使還又言彼不但已也欲全之事危矣 上為之泣下議遣使下明又曰下明兩臣無偏輕偏重適有使者來而下明事已其勅書言修城集

兵原與倭無涉。尚與朕為難。而無決語。命壽言。
大君使來。則事解矣。時大君還自燕。才月餘日。
矣。上必欲遣之。而大君亦請行。上問邊上。
苦寒。厚賜之。十一月。貞敬夫人卒。右相李時白。
上令有司賜賻物。本道成。葬埋之。禮後月。
大君使還。許兩臣放還。而永不叙用。上又厚。
賜之。曰。聞北京先報喜。不可言。公既還。上疏自。
言誤事。貽國之辱。又言西土人心風俗。薦士二。
人。鄭麟壽。韓翼文。皆以才行聞者也。上令以。
軍職在都下。而公乞歸田里。以修史事。召之。公。

辭以清人責言未已應 旨上疏言時事仍及
魯陵六臣旋表事鄭蘊賜謚事癸巳乞養為淮
陽明年春遊楓嶽仍謝歸冬圻內腥霧四塞上
疏曰自金弘郁下獄死君道日元國事日非灾
異日見人心日離忠言謹論絕影於 殿下之
庭 上曰忠君憂國老而彌篤乙未公已七十
以耆老 上令本道賜米肉至明年春又賜之
及秋又賜月俸公辭不受疏十上 上終不許
領敦寧金帛止劄言灾異 上怒恐懼不知所
出公上疏諫仍進養心之戒 上曰處畎畝不

忘諫忠臣義也丁酉上䟽言尹根壽鄭經世論
謚事請寬赦沈大亨俞榮之罪戊戌秋耆老所
有五老會領議政金堉七十九判中樞尹垞九
十二海恩君尹履之八十公七十三判書吳竣
七十二公又上䟽辭月俸仍進清心寡欲之戒
己亥五月 上登遐公入臨既成服而歸 命
製謚冊文進崇政冬乞致仕下吏曹判書宋浚
吉沮之庚子大饑上䟽言賑饑事進屠隆荒政
考請免月俸不許辛丑拜判中樞辭不許以製
太王太后玉冊文召之時大旱 上避正殿理

寃獄下教求言公上疏辭之仍言尹善道事曰
善道之罪何罪也善道以宗統嫡統為孝廟
左袒也當善道獻疏之日誰為殿下進焚疏
之策也高麗恭愍王焚李存吾之疏光海焚鄭
蘊之疏恭愍光海非亡國之主乎今日廷臣其
自許不沒沒而不以堯舜之道導殿下反以
亡國之轍引殿下何也臣恐後之視今猶今
之視昔也承旨南龍翼先啓以譟張陰慘激
上意令上不納而三司爭起而攻之請削官
黜之上命罷職而已領相鄭太和曰某處狀

卽斥黜無損於其身有損於國也左相沈之源
曰某以三朝老臣 上下教求言而以言事得
罪此亡國之事也尹飛卿郭之欽等媚事用事
者爭以攻擊為功三司論以遠竄者自四月至
六月 上終不聽甲辰始有叙用之命乙巳公
八十執義吳始壽白 上有加資月俸之命
進崇祿於是三司攻擊復起公上疏力辭月俸
三上疏 上乃許之戊申有曾為侍從者其父
母年七十以上者皆賜物或加資之命男威鳳
嘗為諫院以故加輔國秋八白雲山欲仍遊紫

雲泉石至文巖入山三日聞 上有溫泉之幸
乃還明年二月四日公卒春秋八十四襲用深
衣幅巾殯於外寢之中堂訃聞 上不視朝巷
市二日其四月葬于先壠北十里鹿門東麓南
向之原貞敬夫人金氏籍安東國初左政丞士
衡之九世孫而吏曹判書瓚之女也婉順謹飭
言不出閨門之外事舅姑庭無間言五十年不
喜誇矜侈靡公通顯於朝貴踰九卿女謁不行
苞苴不近公稱之曰內相之道無媿於古人云
夫人生於萬曆十二年某月某日卒於我 孝

宗元年某月某日春秋六十七初葬於先隴之
傍至是乃合葬夫人三女一男三壻衛率李維
楨正郎李敦臨生負李并徵男正言威鳳威鳳
再娶而生四女三男長女前妻出而壻士人李
允迪次士人姜覲餘幼男九輅九畹九疇李維
楨七男二女男著滿徽茂蕢歲歲壻趙始大金
榮皆士人李敦臨三男一女男后寔后平后昌
后寔生負壻士人李師聖李并徵二男一女男
溥潞壻生負沈柱内外子孫三世六十餘人公
簡靜燕居若齋一不以事物經心不喜聲色玩

好沉潛經術於勢利泊然無所動不言不笑端
坐終日不見情容雅言孝悌節行詩書禮義讀
天下書學博而見益高其出言行事非古人不
為論文學以為秦漢以來太史公昌黎鳳洲最
大家其文章深奧勁切卒澤於道德仁義蒼然
有古作者遺風筆法尚右軍魯公亦勁古有法
蓋皆出於心成於藝者然也教家重恩義嚴內
外臨下威而恕簡而不煩使人人自安平生敦
厚樂善尚禮讓篤於人倫事父母安其寢處樂
其心志必承意順適顏色不急贊成公歿毀瘠

不形哭無常聲既葬不脫經帶飯蔬食守塚三年贊成公疾病索柿以過節不得進終其身不忍食柿宋夫人年高自公貴顯榮養四十年而致公亦八十衣衰麻即位哭居喪之禮以敬為上祭祀非有疾病不許代祭代祭則必晨起盥漱衣服冠而坐以待卒事齊戒必慎將事必嚴有穉弱弟緜於贊成公為遺腹子也公撫育之亦不以愛而教弛緜少有才學不幸早歿又其子威明幼孤公教之如視子今登第為某官事君務大體好犯顏直諫每奏事既退未嘗與子

弟言其事以直道不容於朝通籍四十餘年立
朝僅七八年其處患難窮厄雍容閒暇略無幾
微見於色詞嘗掌銓選秉心公正薦進賢良門
無私謁出為州郡好清靜一以興教化善風俗
為務官位已盛田園第宅無一增益妻子不免
饑寒孝宗特賜月俸力辭不已以無職食上
為耻自灣上歸屏居田里名其廬曰寬居樂山
澤之遊白鷺洲三金落禾積洲白雲洞皆其遊
賞處云上禮遇益隆思欲復用而終不起每
聞災異闕失必盡言不避忌諱善乎其孤潔之

操方劉之氣出天之孝貫日之忠善始善終之
學難進易退之節皜然出於泥滓之外能使頑
夫耻懦夫立其在斯人歟其在斯人歟谷口有
溪潭曰卧龍潭自號曰龍洲寬居靜對錦柱山
亦曰柱峯老人有遺文十卷其銘曰

敦厚禮讓惟孝惟友以篤親仁奉君無私秉心
貞白不緇不磷博文古雅本之道德參以典墳
忠言直道可表百代名立德尊不忮不求好德
康寧彌年壽考善始善終積仁累義天道之報
辛亥仲春之月夢死魄二日孔巖許穆撰

權判書墓碑

公諱縉字雲卿姓權氏高麗太師幸之後而我國初名儒文忠公近之八世孫也曾大父軫重林道察訪大父棕錦山郡守壬辰之亂列郡皆潰而公獨不去死於官守上賢之贈某官命錄其子孫以故父睨除恭陵參奉早世母慶州李氏義禁府都事希參之女也隆慶六年四月二十五日公生生而狀貌瑰偉自為兒戲嬉傑然無數態度萬曆二十五年上幸太學取士公登乙科及第補成均學諭時公二十

六遷都堂司錄明年為承政院注書時兵革未
定天下兵皆集京城上與文武大臣議事公
在上前長於記事莫不曰能其十月改春坊
說書累轉司諫院正言後年由騎省正郎復為
正言入玉堂為副修撰修撰當路忌之斥為慶
尚都事後再為秋官正郎復出為三南道海道
判官當大亂板蕩之後撫懷不怠漕戶大蘓入
為司憲府掌令尋陞執義知製教癸卯復入
玉堂為校理甲辰以校理改成均直講時量諸
道田選才能剛果明於吏事者為御史分遣之

公出湖南善於鈎隱燭奸能得吏民姦稱得人
乙巳夏復為副校理忤時議徙散班出為大同
道察訪罷數年不復官矣戊申拜司導寺正其
二月光海君立於是有臨海君事以治獄問事
例陞通政為衛將己酉拜慶州府尹為不悅者
所劾罷秋為敦寧府都正庚戌為襄陽問高年
勸農乘鍊戎卒邑大治體相李公恒福巡行東
界褒以治行第一又為用事者所劾去壬子為
土曹叅議以戊申治獄策功公在三等拜同副
承旨時均諸道田以公嘗為御史湖南量田無

失特差湖左均田使治奸猾吏徙土豪於邊民
大悅右族多憚之癸丑還為右承旨時有永昌
獄起獄事滋蔓延興家既族滅而大妃弟金
瑄以童稚當刑公以法爭之仍上䟽言寬刑罰
釋冤枉以迎天和公居密直三年以久勞陞嘉
善辭曰以列卿比同叅下小官循資考格不可
仍乞歸養不許時廢三母妃議起草野生趙漫
上䟽言倫紀事得罪鄭仁弘上劄罪狀漫以為
賊當誅公曰漫不可謂賊不納兩司交論削奪
官爵斥黜一年既冊翼社功會盟新舊功臣公

例陞正憲出為水原明年咸鏡道觀察使缺時
北虜盛強數寇邊朝廷患之以為非某莫可任
者特遣公首獎廉謹勤職吏黜貪污不循法
甚者以肅列邑以客兵遠戍衣糧不繼將有變
撫循塞卒條上方略戊午持承重喪既三年拜
判尹尋遷左叅贊壬戌監軍梁之垣來見而賢
之請崇用特陞崇政癸亥春為兵曹判書時李
爾瞻權勢日盛自三公以下恭事之恐不及公
於朝會一揖之外不與交私語元元不為嬖姁
取媚狀當路者共為指目謂詆論劾不已公亦

上疏乞免見國事日非既力不可救慷慨寧欲
一言得罪念太夫人臨年縱不果常嘿嘿不怡
心恨之及仁祖克大難在位者多亡逃散亂
無所定舉義諸將陳兵衛上而已金公塗洪
公瑞鳳相謂曰某多智諳鍊體要白上召與
計事公至則召諸衛兵守闕封府庫具法駕
奉 上迎太妃於西宮曉諭街坊人心乃定在
列者莫敢一言肅然畏懼之既而三上疏適兵
曹時盡罷光海諸功臣公降受正憲行義興衛
上護軍功臣等多庸人崛起畏惡公賢能又以

私憾積怒於公者元功數家相與謀曰非冤獄
難以動上意乃曰癸丑之獄無罪者誣服某
實主之又以飛語相傳曰延興賜死某以私怨
辱之欲感怒太妃家令助言為禍鄭公曄聞
之曰吾與某同在政院知終始事莫我若金瑄
之死某以為刑不及童子以法爭死刑當時耳
目皆在不可誣也延興之死同僚皆避而獨某
與我啓慰慈殿我既罷某又以趙漫事得罪
辱延興者其時郎吏一人之言而廼陷人若是
耶功臣等私謂曰縛虎不可不急陰嗾論事者

囚之梁山海上鄭公咄咄歎曰永昌之死某
泣言其無罪今反受寬宥之譖耶自黜令其客
廉察嶺南臨行陰與謀送之客後叅振武原從
追爵領議政閔聖微者也未久李适叛功臣等
大懼所忌者皆殺之為公謀益益急而微見人
心大亂故持之以觀變聞适敗死急令傍邑太
守慶嶸圖之成言曰某與倭通叛形已具云或
知其謀急告曰馳走行在所可得免也公曰
死命也適足為奸人藉口耳不動居無何果有
傍郡兵急至公曰君有命固不辭死願見上

言言卷之四
言
旨業無以應促召兵遂遇害二月十八日年五
十三人心莫不冤之鄭公為大司憲曰某重臣
一朝以曖昧得罪亦已冤矣藩臣擅殺而不問
將何所用法也力論之既下理功臣等反以為
功多而 上猶黜之尋復顯用也其四月十三
日甲午歸葬抱川權氏族葬公嚴重寡言善於
論事遇事生風不以辭色假人平生多抑凡戊
申以後又不合於時議官雖貴實無上下之交
也惟相國朴承宗深知其才能推挽之不已卒
為小人所制至於窮抑心畏忌雖親戚之私亦

不通書來往卒不幸至此梁山父老至今垂涕
淚言之其銘曰

子奢之疾刀父之張魁才抑兄長大媒殃時命
嶮岢罹此不祥盜殺無忌威福易常恤人尚制
漸不可長刻之山石以雪泉壤

前夫人青松沈氏成均生員蓉之女早卒無子
後夫人豐山沈氏僉知中樞日旄之女而右議
政致仕守慶之孫也十九歸權氏公既喪前夫
人有妾媵數人色不忤言不愠謹修婦道祖姑
林夫人既年高又太夫人在堂事之一以順適

為心祭祀必誠宗族必睦門庭之內嚴而主恩
過則教之改則忘其過癸亥梁山時夫人從之
及公遇害夫人欲同死以殉而念死無以暴寃
而讐不雪斷其指置之棺歛之內及葬又如之
納之壙中曰以代下從日守闕訟寃累月不
去行路皆涕泣自點沮不上聞既無可奈何廬
於墓下冬不絮寢不席啜粥哭既三年猶食蔬
食寢薦夜則號天日出則祝日後十二年上
釋其無罪命復其官洪瑞鳳實白上也自
點卒以大逆族誅聖徽又使燕死於道而不返

子孫皆死絕祀無後也夫人平生以不得同死
常恨於心夫人八十七二月十八日歿其四月
十三日甲午附葬公被害後四十八年夫人歿
之日同葬之日甲子又同可謂天道之感也夫
人又無子以從子脩為後公死之時脩才七歲
夫人日夜泣血求死而猶必擇師勸學脩以才
行發聞公復官之十年脩舉進士後十九年登
乙科第一人及第以其官出為安山時夫人歿

記言卷之四十終

記言卷之四十一

許氏先墓碑文石誌

駕洛國君首露王納陵碑陰記

王姓金氏或曰先古應祥化生始爲生民之祖
或曰少昊金天氏之後也東漢光武皇帝建武
十八年王始建國號爲君或曰以其神明之後
有九千共尊之爲王都駕洛首露史記以爲王
名而因以爲爲君之號曰首露王王御國百五
十八年薨葬納陵或曰首陵當孝獻皇帝建安
四年傳居登麻品居叱彌伊尸品坐知吹希銓

言言卷之四十一
知鉗知仇衡凡十世四百九十一年仇衡生武
力武力生舒玄舒玄生庾信庾信碑言其祖所
出古時載籍不詳惟王之世黎民大化四方來
則之號爲淳厖之治舊俗邦人追祀王以報德
至今以冬至日大祀一皇明萬曆八年嶺南觀
察使許曄大修王墓其後十三年國有倭寇其
年掘王之墓邦人共封等之歷泰昌天啓崇
禎至今五十五年巡察使許積增修之建墓碑
曰駕洛國君首露王墓

駕洛國普州許太后墓碑陰記

太后姓許氏譜牒記阿踰陀國君之女金官古
事或曰南天竺國君之女又曰自言西域許國
君之女許或曰許黃之國方外別國其有一國
而互稱或如中國之殷商梁魏邪古遠後世傳
說不同誌記其先君之命曰東土當有駕洛元
君得汝爲配浮海而至云首露王立爲后號曰
普州太后或曰皇王夫人當東漢光武皇帝建
武二十四年首露王七年及靈帝中平六年三
月太后薨壽百五十七太后有子十人得后姓
者二人後世各以其所受封之地別爲族爲孔

巖河陽之許又其餘各以其鄉著姓者非一而其初皆本於太后太后墓在王陵後一里舊俗邦人以冬至日大祀先王以太后配食至今不絕也我昭敬大王二十五年有倭寇掘先王墓并及太后墓邦人更封等之上之二十四年嶺南觀察使許積大修墓仍立石記其事有父老傳萬曆八年古有觀察使許公曄嘗修二陵云至今追計六十七年

文正公墓碣陰記

我十世祖許文正公諱伯本孔巖人皇祖考文

敬公諱珙皇考版圖佐郎諱冠事在麗史本傳
我文正公高麗肅王四年及第既以文學顯惠
王後五年春以陽川君判田民都監事夏王初
實書筵公以同知密直爲書筵侍讀冬拜密直
司使定王元年冬拜贊成事至恭愍王二年復
爲書筵侍讀後十六年改官制公復以贊成事
拜中書侍郎同中書門下平章事其冬王作馬
山之役放逐三公大臣時公與尹桓柳濯同竄
明年七月己亥卒謚文正子孫遠者今十二世
三世具在系牒系牒曰墳墓在開城西熊谷錢

浦與大匡閔拊墓同原辰韓國大夫人鄭氏墓
在右崗或曰森樹里云大匡文正公之壻而我
恭定王妃元敬王后之祖也錢浦甘露寺東數
里有三墓而後二墓一壻前一墓又一壻父老
傳說許相國葬而已皆無標石可識者 上之
三年壬寅春十一世孫白川郡守崙於後墓前
壻下掘得斷碑有大匡驪興君閔拊七字其左
傍又有陽川縣夫人許六字而折其三之一壻
上石跌尚在又得其折者字雖缺合之壻上跌
無差然後乃知大匡墓後而文正公墓前縣夫

人墓最後也文正公墓至今二百八十六年郡
守嶠治石碣未建而去十三世孫平山都護府
使珽樹之墓前時清主康熙四年乙巳云

判奉常寺事墓碣陰記

公諱愔字原德姓許氏本陽川人曾祖同中書
門下平章事謚文正公諱伯祖密直司知申事
諱綱父典理判書諱錦母原州元氏外祖政堂
文學諱松壽元至正十四年乙巳公生大明洪
武十三年庚申進士後三年癸亥陞補生負我
太祖世爲廣州牧使以判奉常寺事謝去豐壤

吟哦自娛別號梅軒或曰梅叟有梅軒詩集宣
德六年辛亥二月十日公六十七歿夫人安東
權氏曾祖都僉議司事謚文正公諱溥祖都僉
議右政丞謚正獻公諱煦父同知密直諱重貴
母德陽竒氏德城大君諱輶之女元至正皇后
之兄也夫人與公同年生公既歿之後月十八
日夫人歿其年十月合葬長湍鳳川上西向之
山以曾孫琮琛皆顯於我世祖睿宗成宗間
追爵三世公爲吏曹判書夫人爲貞夫人二男
襄陽都護府使扉護軍樞今子孫九世十世三

公列卿二十餘

贊成公墓碑

公諱磁字南仲姓許氏本孔巖人曾祖襄陽都
護府使諱扉祖陝川郡守諱薰考義盈庫令諱
瑗母善山金氏明孝宗弘治九年燕山二年
閏三月乙亥公生少與尹公慨同學慕齋先生
人稱之曰佳哉兩家父母有此子也十六先大
夫歿先生銘其墓其序言賢不食報男某聰穎
夙成天將大其來以報其德云武宗正德十一
年我恭僖士年選成均進士金萬鈞榜下已

卯設賢良之科公以才行選不應托遊蹤不東
以避名其年黨禍起世宗嘉靖二年我恭
僖十八年春登謁聖丙科及第申瑛榜下既
登第選玉堂賜暇書堂有戊子東湖詩卷奉
使再出嶺南一廉問郡邑一按覈田災也當金
安老用事以吏曹正郎出楊根郡守後陞通政
復出爲黃州龔太史之來也望見公立於列問
之曰彼秀而頽者爲誰莫是蹈瑕隙而拓落者
耶爲之嗟嘆良久其年安老敗入爲兵曹叅知
後四五年之間常侍近密朝京師一任方面

者一湖西觀察使時大小尹之隙已成朝廷有
隱憂矣於是上甚倚任公以禮曹叅判特拜
判書時文定王后家號爲小尹而大尹者尹
任者也章敬王后之兄也自謂扶護東宮
恭僖時倚安老欲廢文定安老敗任將得罪
上以世子故加厚之任不疑日與柳灌柳仁淑
李霖鄭源郭珣李若海等深相結丙丁錄曰任
判書權心憂之私謂其客曰近觀國事日非慎
莫交昭格洞人禍且及矣若海聞之以爲誹謗
劾之乙巳仁宗大漸任與大臣陰爲擇賢之

謀矣及明宗嗣位而文定臨朝有密旨下
李芑鄭順朋林百齡及公數臣者謀去任初兩
司論之而兩司多抑客不肯從芑乃白上刑
曹判書任寬吏曹判書仁淑罷左相灌遼尋皆
賜藥死而獄事起既得任陰事前言任罪狀未
著者皆恐懼請罪而事適良善芑專誅殺公深
恨之每議獄與芑常相反及定功行賞上重
其功命元功子弟有勞者令皆得功賞公自言
無功疏七上上乃許芑怒謂曰上待功臣
欲與共休戚今不受者何也公常歎之曰任久

存形跡固有罪至於論功賞吾甚慚罪人妻孥
沒為奴婢分 賜諸功臣者公皆謝遣之一不
以功臣自居每以數直諫 上頗不快判中樞
四年不復任用公居西湖之二憂亭亦不預時
事邕以功爵自滿其所為益無忌憚矣庚戌由
左贊成為吏曹判書公嘗上疏言陳復昌之姦
邪小人至是復昌恃恩益恣北伯闕試求之欲
觀公之待已也公曰初具壽時嘗誤薦復昌乃
並擬之復昌實不意有此擬也大恨之閔二相
齊仁嘗力伸冤枉目為黨逆謫居公州而其弟

齊英得唐津芭已深怒於公以爲與罪人陰相
厚時陳復昌李無疆爲兩司令論之以護逆與
閔齊仁宋純等締結邪論且引唐津事文其罪
案付處北道之洪原芭爲首相十五日竄逐宰
相公及李浚慶閔齊仁宋純李潤慶具壽聘皆
重於時人人反目具公賜死死公亦將不免一
日芭早朝暴死朝堂果有讒書在衣袖中人謂
之天殃云明年三月十四日公卒於洪原當嘉
靖三十年我 恭憲六年春秋五十六歸葬漣
上其冬玉堂上劄言無罪 上感悟命復官爵

加 贈領議政問平日所與深者金憲胤撰

賜祭文我 昭敬七年副提學李珥力伸乙巳

人 上問領議政李浚慶對曰乙巳善人或

坐死者及削勲朴民獻奇大升金貴榮等皆曰

不可於是新舊黨人之議起追削李苞等官

爵公亦在削中白仁傑許曄尹根壽僉曰某可

宥不可罪也 上從之東閣雜記曰權賛成撥

初以任灌仁淑之竄謂暗昧受罪 上心不快

尹思翼曰當 大行大漸臣謂撥曰惡迎大君

撥不荅及有命且 啓曰有大臣在臣不敢擅

此事及出許公某瞠視思翼曰當危疑之日權公以大義力贊大計無他意也欲陷之者何也思翼大慚丙丁錄曰東崖南仲俊邁有風度爲儕輩所重嘗爲吏曹判書不受關節區別賢否小人多惡之卒以讒謫死洪原平生好義計俸祿常費別蓄其餘恤有喪賙有惡聞其死莫不憐之公居東郭下自號東崖男檀以善居喪聞除典艦司別提不出又有側室男二人檐欄

贊成公墓碑後語

贊成公常恨之乙巳治獄多冤卒以此竄歿於

窮域良爲痛恨封功賜奴婢多得罪者妻孥沒
入者公謝遣之一不以功臣自居當時被罪之
家涕泣感歎以爲厚德頃年吾家子弟將受學
於懷義君懷義君者桂林君之曾孫爲之稱道
古事不已玆原君亦爲我言此事如此昔者閔
振衣汝任嘗爲史局見吾先子曰子之先相公
當乙巳敢諫直言具在實錄使人見之不覺竦
然嘖嘖言之伸乙巳人事在三十年後當時者
者皆死論事者多新進後生不過傳聞而已况
知公終始者乎白四宰仁傑許觀察曄尹海平

言言卷之四十一
根壽數人而已如削功告廟文休庵俛仰二行
狀所言多失實蓋不足怪恨實錄不可見海東
野言東閣雜記丙丁錄略可見也

贊成公夫人墓碣陰記

夫人禮曹判書許公諱磁夫人也姓李氏國族
波澄副守諱終巖之女咸陽君諱誥之孫讓寧
大君諱緄之曾孫母坡平尹氏丹城縣監孜善
之外孫也公事 中宗仁宗明宗貴至列卿夫
人封貞敬夫人夫人至性慈仁恬靜壽至八十
五公卒二十四年卒夫人生於明 敬皇帝弘

治三年庚戌五月二十六日至卒之年 顯皇

帝二年十二月二十九日葬軍營判書公墓北

隴義盈庫令府君墓下男樞典艦司別提孫男

女四人長孫喜生冕皆早世次亮 宣祖二十

一年戊子春榜進士亦早世生厚安東大都護

府使次喬抱川縣監有三男曰穆司憲府掌令

曰懿松禾縣監曰舒寧越郡守孫女壻曰春城

副正偉我 成宗之曾孫也無子有養子德林

守禧胤

別提府君墓誌

公諱樞字士牙姓許氏昔駕洛國絕許氏分散
爲三族今孔巖之許其一也孔巖十七世有陝
川郡守 贈左贊成諱薰於公爲曾祖考祖考
諱瑗義盈庫令 贈領議政考諱磁事 中宗
仁宗明宗三世爲宰相妣貞敬夫人李氏我

恭定大王之曾孫也公博覽強記好高潔恥以
利達爲心 文定時李苞用事朝野反目贊成
公常恨乙巳之獄獄刑濫而無罪者多連死斥
言苞之專恣以故苞深怒之讒言曰某以功臣
造言誹謗卒爲窮北之寘苞猶欲必寘之死而

芑死故得免然卒於洪原公居廬啜粥哭幾滅
性既三年以行誼除典艦司別提不出獨守四
十年放跡江湖謂之西湖處士而陶山李先生
追和詩亦言之 昭敬中東方大亂避兵峽北
沒於鬼山之壽仁歸葬連西公 毅皇帝正德
十五年二月廿六日生 顯皇帝萬曆二十年
十一月二日歿爲七十三公既謝絕交遊惟日
讀古人書以老終贊成公嘗纂歷代史鑑未成
而卒公繼之書成凡三十卷宜人晉州姜氏中
古相肅獻公諱龜孫之曾孫金文敬公諱安國

之外孫也公歿後十一年夫人八十一歿長子
喜生冕冕生翼翼生戡四世早歿而戡無子次
女適宗室春城正偉無子次子亮進士亦早世
生厚司憲府掌令生翼其二女婿申冕宋孺徵
少子喬抱川縣監生穆懿舒穆司憲府掌令懿
松禾縣監舒寧越郡守穆生朝嗣二女婿尹
昇萬鄭岐胤舒生珩翺翺女二人一人嫁沈
根一人未嫁子孫至三世四世四十餘人後世
庶賤
不
錄

祖母宜人晉州姜氏墓碣陰記 改撰見下

先妣羅州林夫人墓誌

先妣羅州林氏東都大尹諱鵬之曾孫關西節
度使諱晉之孫禮曹正郎諱悌之女大司憲
贈領議政月城府院君金公諱萬鈞之外孫也
萬曆乙亥二月三日先妣生十五歸于先考先
考諱喬字壽翁萬曆末累官大江之西有遺愛
卒無顯者推挽終抱川縣監當崇禎五年十二
月二日其後十六年七月十日先妣歿子男三
人前三陟府使穆前松禾縣監懿寧越郡守舒
穆生翽翽女二人婿尹昇萬鄭岐胤懿無嫡

子有枝庶子三人幼舒生班翀翹女二人一人適沈根一人幼先妣慈仁好施雖親子孫未嘗加姑姆之愛踈親遠屬待之如一至於妾媵婢僕亦未嘗察察爲苛故無怨於人而恩亦不衰初喪之日隣里莫不出涕僕隸嘗老而歸聞訃來哭有千里而至者先府君嘗稱之曰有德者必受其報先妣者艾之年四頂童髮恬靜少爲起居不衰至臨歿之年每晨則盥櫛洒掃居處必莊衣服必整器用必潔淨令侍側者不許間出死生大變必有前兆自知者然耶嗚呼慟

矣墳墓在漣西先考墓右壠南向爲封

記言卷之四十一終

